

**E TRATADO INTERNACIONAL
DI NACIONNAN UNI PA CU
CONTAMINACION DI PLASTIC
MESTER TA MAS AMBICIOSO**



WWW.SOLODIPUEBLO.COM



SOLODIPUEBLO@GMAIL.COM

**CACHO RIBA CAYA
A MORDE UN
PEATON DI EDAD Y
AMBULANS MESTER
A BAY ATENDE!**




**NA E ROTONDE BALASHI
UN CHAUFFEUR A BAY
NORT Y A DAL RIBA E
PIEDRANAN GRANDI Y
RESULTA HERIDA**



**PROME MINISTER MIKE
EMAN A LOGRA ACUERDO
PA POR TRASPASA
CASNAN DI FCCA**



**CUIDA BO SALUD DURANTE
DIA DI CALOR INTENSO:
Recomendacionnan pa
proteha bo bienestar**



CUIDA BO SALUD DURANTE DIA DI CALOR INTENSO: RECOMENDACIONNAN PA PROTEHA BO BIENESTAR


031 di juli 2025: Den bista di e ola di calor cu ta afectando Aruba actualmente, Departamento di Salud Publico (DVG) ta haci yamado na tur residente y bishitante pa tuma medidanan preventivo pa proteha nan mes y nan salud.

Calor extremo por trece riesgo serio pa salud, especialmente pa e grupo vulnerabel manera mayornan di edad, mucha chikito, hende cu malesa cronico y esnan cu ta traha pafo. Calor por ocasiona cansancio, golpi di calor (heatstroke), deshidratacion y empeoracion di malesanan cronico existente.

Consehonan util pa protehe bo mes durante dianan di calor:

1. Bebe hopi awa o Mantene bo curpa hidrata: bebe awa regularmente, apesar cu bo no tin sed. o Evita alcohol, coffie y refresco cu hopi sucu, nan por causa deshidratacion.

2. Mantene bo mes fresco o Keda paden durante e oranan di mas solo (11:00 AM – 3:00 PM). o Usa ventilacion (ven) of airco si ta disponibel. o Tuma douche friu pa baha temperatura di bo curpa.
3. Bisti paña color cla y liviano o Usa paña hancha, di color cla, y di tela liviano. o Usa pechi of sombre o Usa bril di solo ora bo ta sali pafo.
4. Proteha bo cuero o Usa sunblock (SPF 30 of mas halto) y ripiti e aplicacion cada dos ora.
5. Tira bista riba hende vulnerabel o Haci contacto regular cu mayornan di edad, bisiña y famia cu malesa. o NUNCA laga mucha, hende of mascota den auto cera, ni pa un rato cortico.
6. Limita esfuersonan fisico o Evita haci



trabounan fisico durante e ora di mas calor.

- o Si ta necesario, tumapausafrecuentemente den sombra y bebe awa constantemente.
- o Evita deportenan pafo durante oranan di mas calor

Sintomanan di malestar relacional cu calor:

- Cansancio extremo pa motibo di calor: soda hopi, cuero ta cayente, mareo, stoma ta bira, dolor di cabez.

- Golpi di calor (Emergencia): temperature cu cuero halto, desorientacion, perdida di conocimiento, cuero seco sin sodo.
- o Den caso di sospecha di golpe di calor, yama 911 mesora. Keda informa Sigui e boletin di tempo y informacion oficial via canalnan di gobierno of Departamento di Salud Publico. Nos ta pidi na tur hende pa cuida nan

mes y otro. Cu medidanan preventivo nos por preveni hopi problema y pasa e temporada di calor den manera sigur.

Pa mas informacion like nos Facebook page Directie Volksgezondheid DVG Aruba, Follow nos riba Instagram directie_volksgezondheid_aruba, subi nos website www.dvg.aw, yama nos na 5224200 of mail nos na

Clasificados





SOLODIPUEBLO@GMAIL.COM
CEL.585 9500




**OPENBAAR
MINISTERIE
ARUBA**

Corte di Prome Instancia 7 augustus 2025

Horario	Sospechoso	Acto Castigabel
08.30	W.J.Q.A. M.P.V.F. V.J.V.L.	E sospechosonan ta wordo acusa di a viola ley di droga dene periodo di 25 y 26 di augustus 2024.

KPA A DESPEDI DI HARRO DAMSTRA



MACUARIMA, ARUBA: Recientemente mando policial di Cuerpo Policial Aruba a tuma despedida di hefe di operacion di KMAR na Aruba, Harro Damstra. Cuerpo Policial ta agradecido na e tremendo cooperacion durante e tres

añanan.

Hopi desaroyo inovativo den cooperacion policial y vigilancia di frontera a tuma lugar den maneho conhunto entre e diferente departamento di seguridad.




Sr. Damstra a sa di dirigi e parti operacional di KMAR na Aruba. Ademas di tremendo resultadonan operacional nos lo corda Sr. Damstra como un lider inspirativo y humano y cu amor pa nos prohimo.

Danki sr. Harro Damstra pa e bunita cooperacion. Nos di Cuerpo Policial Aruba ta deseabo tur cos bon den bo reto nobo na Hulanda.




CHAUFFEUR CU NO A DUNA PREFERENCIA NA RUDOLF ARENDSSTRAAT A CORE BANDONA SITIO DI ACCIDENTE

Diamars atardi a drenta informe di un aaccidente cu hende herida na e crusada Rudol Arendsstraat cu Weststraat, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un accidente unda cu e chauffeur di un Hyundai i10 biniendo for di pariba no a para pa duna preferencia na e Kia Seltos



for di Weststraat y nan a dal den otro. E chauffeur

a baha for di e Hyundai y a bandona e sitio mientras



e dama den e Kia a resulta herida. Na yegada di e

ambulans nan a atende e dama levemente herida.

ACF: E COMPLEHIDAD DI MANEHA IMPACTO DI BISHITANTE NA MANGEL HALTO



Como e organisacion di maneho di Aruba su areanan protegi terrestre y marino, Aruba Conservation Foundation (ACF) kier elabora riba e proyecto di renobacion cu a wordo conduci riba e palapanan existente na Mangel Halto.

Un di e desafionan creciente y compleho di nos tempo ta maneha e balansa entre turismo y conservacion di naturalesa, specialmente ora cu ta bin na e impactonan social y di medio ambiente di infraestructura di bishitante, manera e renobacionnan na Mangel Halto.

Mangel Halto mas y mas ta birando un area hopi bishita pa local y bishitantenan di afo y e subida den bishitante ta representa menasanen mas grandi ainda ariba e medio ambiente y e comunidad den e area. Den e ultimo lunanan, ACF tawata den contacto di cerca cu varios di e representantenan di e comunidad di Mangel Halto kende a trece dilanti nan preocupacionnan, cu ta inclui e situacion di deterioracion di e palapanan, pero no limita na esey so.

E renobacion di e palapanan y gazebonan na Mangel Halto ta parti di un colaboracion mas amplio entre Aruba Tourism Authority (A.T.A.), primordialmente dirigi na reduci e impacto humano riba e sitio ecologicamente sensitivo akinan, y asina maneha bishitantenan activamente y crea espacio pa naturalesa. E renobacion na Mangel Halto a cuminsa na november 2022 como parti di un proyecto multi annual bou di e gabinete anterior na areanan di Boca Catalina, Mangel Halto y Rodgers Beach, financia pa A.T.A., maneha pa un empresa ingeniera contrata, den colaboracion cu ACF pa recomendacionan medio ambiental.

E obhetivo di e proyecto di Mangel Halto ta pa responde na e necesidadnan di naturalesa, e comunidad di Mangel Halto, y bishitantenan di e

area, pa renoba e palapanan deteriora riba lama y riba e costa, e brug, e trapi, y ultimamente e dek, den un manera cu ta mas alinea na metanan di conservacion y sostenibilidad a termino largo.

Fase I a encera e reemplazo di palapanan existente riba beach cu gazebo pa asina miho maneha e fluho di bishitante asina respondiendo na e cantidad di bishitantenan na Mangel Halto. E aumento grandi di bishitante local y internacional na e area akinan a causa hopi daño na e mangelnan pasobra personanan tawata bay den e mangelnan pa asina busca sombra di solo, asina destrosando habitat di por ehempel e soldachi (Fiddler Crab), ta colga tasnan y serbete na e ramanan di e mangel, y ta laga atras mas sushi ainda den e raiznan di e mangelnan.

Fase II, cu a cuminsa na januari 2025, cu e reemplazo di palapanan existente riba e costa cu a wordo completa luna pasa.

Pa fase I y fase II, e proyecto a tuma lo siguiente den consideracion prome cu eheclusion:

- A reduci e number total di palapa, y no a bin cu mas palapa.
- A kita e structura reduntante.
- A realoca e palapanan pa areanan menos ecologicamente sensitivo: a kita palapa di area unda cu tin mata ta crece pa asina mester stop di corta e mata y laga vegetacion natural pa regenera, trahando mas especio pa naturalesa.
- A realoca e palapnan riba costa mas leu di e liña di costa pa reduci e chens cu sushi ta cai dibiaha den lama.
- A restaura habitat costal door di crea mas espacio na e costa pa especienan costal manera e Sternchi of Bubi por unabes mas cuminsa usa e costa pa broei den futuro. Por observa caba Sternchinan den e area.
- A diseña e palapnan cu un fundeshi fuerte y solido pa por wanta e biento costal fuerte y asina

garantisa e siguridad di bishitantenan, mientras a incorpora cu e parti ariba di e palapa por facilmente wordo mateni sin mester atrobe stroba e fundeshi of e naturalesa cu ta rond di e palapa. Mescos cu tur otro proyecto cu ACF ta envolvi aden, esfuersonan activo ta wordo haci pa por involucra stakeholders, y pa e proyecto akinan, ACF a sigura di involucra e comunidad di Mangel Halto. Localidadnan di e palapanan a wordo escoge cu sugerencia y den presencia di representantenan di e comunidad.

Tumando den consideracion e complehidadnan akinan, ta un momento curcial pa nos para keto y refleha con, hunto cu e gobierno nobo ta bay maneha e infraestructura y actividadnan turistico, y nan impacto riba naturalesa. Bayendo dilanti, ACF como un organisacion di maneho di conservacion ta keda comprometi na tuma e pasonan necesario pa fortalece protocolnan y sigura cu un sorto di Evaluacion di Impacto Ambiental (EIA) ta central na tur proyecto, carga pa ACF of haci den colaboracion cu ACF. Como parti di e compromiso aki, tur palapa y gazebo lo tin regla, regulacion, y mensahenan cu ta enfatisa e balor di naturalesa integra como parti di nan structura locual cu ta hacie mas facil pa usarionan por compronde y adopta comportacion responsabel den e area akinan.

Mientras cu tur esfuerso a wordo haci pa cumpli cu e consideracionan medio ambiental, tambe a haci esfuerso pa integra e necesidad di ambos naturalesa y e ser humano. E momento aki ta pone enfasis riba e complehidad di un realidad mas amplio y urgente. Aruba mester defini con e lo maneha turismo y su impacto riba naturalesa awo y den futuro. Di palapa, pier, y actividadnan di recreacion, persigui balansa ya no ta un opcion mas, e ta esencial den e contexto di cambio climatico, un poblacion cu ta sigui crece, perdida di biodiversidad, y e number di bishitante pa nos isla cu tambe ta sigui crece.

Conservacion di naturalesa no por wordo haci door di ACF so. Nos ta conta riba e comunidad di Aruba pa ta e wowo y e orenan di naturalesa hunto cu nos y avisa di cualkier problema na momento cu e ta pasando. E naturalesa aki ta di nos tur y ACF semper ta habri pa cualkier persona trece su preocupacionan of preguntanana dilanti, of duna feedback critico pa asina accion por wordo tuma den e momento y no despues.

E TRATADO INTERNACIONAL DI NACIONNAN UNI PA CU CONTAMINACION DI PLASTIC MESTER TA MAS AMBICIOSO

- E mundo mester un tratado fuerte pa yuda proteha nos planeta y stimula industria pa ta creativo y innovativo pa bin cu alternativa pa plastic cu ta menos dañino pa nos medio ambiente.

E informacion y datonan cu Directie Natuur en Milieu (DNM) ta comparti cu comunidad ta saca di e publicacion 'International journal of science- Nature' di dia 10 di juli 2025. E informe ta enfoca cu e tratado internacional di Nacionnan Uni pa combati contaminacion di plastic ta na un punto crucial. E consumo mundial di plastic ta sigui aumenta rapidamente. Mas cu mita di tur plastic produci, tur ta produci despues di aña 2000. Ta proyecta cu pa aña 2050 e produccion lo redobla siendo cu ta recicla menos di 10% di desperdicio cu ta clasifica como 'single-use plastic'. Loke ta mas pio ta cu e desperdicio aki ta caba den lama y naturaleza rond mundo.

Dos estudio nobo publica den revista Nature ta muestra cu e problema ta mas serio cu a pensa. Un di e estudionan a descubri cu por tin 27 milyon tonelada di 'nanoplastic' (particularnan masha chikito mes) den e lama Atlantico. Nanoplastic ta particularnan cu ta midi menos cu 1 micrometer den diameter, tambe referi

como micron. Su simbolo ta μm (letter Griego sigui pa e letter m). E ta un unidad di midi den e sistema internacional pa midi unidad (S) cu ta igual na 'one millionth of a meter/één miljoenste van een meter (10^{-6} m)'. E otro estudio a identifica mas cu 16,000 substancia deriva di plastic, di cual mas cu 4,200 di nan ta toxico y no ta decompone den forma natural.

Tratadonan internacional ta difcil pa crea y pa haya tur partido pa uni riba esaki. E proceso por ta uno largo, pues, e ta tuma tempo. E tratado cu ta drenta den negociacion na Ginebra, Suiza na augustus 2025, mester ta fuerte y ambicioso. Tin algun pais manera Arabia Saudita, China y Rusia, cu ta keda opone regulacion riba produccion di plastic y tambe substancianan dañino. Pero mas cu 70 pais incluyendo Union Europeo (EU), Australia, Canada y Reino Uni (United Kingdom), ta boga pa un tratado cu ta pone limitacion riba produccion di kimiconan pa cu plastic. Loke ta e posicion di Merca bou di e administracion actual ainda no ta sigur. Pues Merca no ta forma parti di e coalicion cu ta opone produccion di substancianan dañino. Aunke algun pais a tuma accion independiente, manera Union Europe (EU) cu na 2019 a tuma nan



mesun direccion contra produccion di plastic di un solo uzo, e tratado global ta esencial. Esnan cu ta na banda di un acuerdo swak ta bisa cu, si corta den produccion y regula kimiconan esaki ta nifica pone na peliger e trabou pa hende y nan sobrevivencia particularmente pa futuro generacion. Pero si busca pa haya alternativanan pa cu produccion di mas plastic ta apoya creacion di industrianan nobo y innovativo pa generacion di futuro y un planeta saludabel cu por biba aden. Si no logra un acuerdo

fuerte na Ginebra, mester considera un "plan B" pa logra un acuerdo pafo di e proceso di Nacionnan Uni. Pero e conclusion ta keda cu no tin un "planet B", pues un di dos planeta Tera.

Di parti di Directie Natuur en Milieu (DNM) nos ta keda boga pa un y tur ta mas consciente di nan mesun consumo y scoge pa productonan cu tin menos plastic. E ley cu ta prohibi uzo di plastic di un solo uzo ta vigente y su contenido ta riba nos website dnmaruba.org bou

di e catergoria 'leynan'. E impacto di plastic rond mundo incluyendo Aruba ta uno irreversible y ta cabando cu e naturalesa y bida marino.



NA E ROTONDE BALASHI UN CHAUFFEUR A BAY NORT Y A DAL RIBA E PIEDRANAN GRANDI Y RESULTA HERIDA



Diahuebsmadrugaadrenta informe di un accidente cu hende herida panort di e rotonde Balashi, mesora a dirigi tanto polis como ambulans na e sitio. Na

yegada di e patruya a bin compronde cu e chauffeur di Toyota Yaris saliendo for di e rotonde a baha caminda dal fuertemente

riba e piedranan grandi y a bay dal su cabes na e windshield. Na yegada di e ambulans nan a atende y a transporte pa hospital.



CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



THE CASINO AT ST. REGIS ARUBA TA CUMINSA CU “EXQUISITE BINGO”

TUR DIASABRA Y DIADOMINGO MAINTA CU \$5.000, - NA PREMIO Y \$25.000.- JACKPOT PROGRESIVO



Palm Beach, The Casino at St. Regis Aruba ta invitabo na su prome “Exquisite Bingo” cu lo tuma luga diasabra awo 2 di Augustus 2025 pa 8.30 AM.

Porta ta habri di 7.30 AM pa asina duna oportunidad pa cumpra carchi di bingo na un balor di \$20,- .

Si bo cumpra 2 carchi di bingo bo lo ricibi e di tres completamente gratis.

Pa esnan cu lo desea di sigura nan carchi trempa, por haci uzo di nos pre-sale cu lo ta tur diabierna y diasabra di 3:00 PM – 8:00 PM. Tene na cuenta cu cuponan ta limita.

Lo tin un total di \$5.000,- na premio

Wega 1 lo ricibi \$150,-

\$ 500,-

Wega 2 lo ricibi \$150,-

\$ 700,-

Wega 3 lo ricibi \$200,-

Wega 5 lo ricibi

Wega 6 lo ricibi

Wega 7 lo

ricibi \$1000, -

Wega 4 lo ricibi \$ 300,-

Wega 8 lo ricibi \$2000,- (Progresivo den 50 jamada)

Bin pasa un rato agradabel y tin e oportunidad di ta un felis ganador di nos “Exquisite Bingo” of purba bo suerte hungando weganan di mesa, slot machine nan di ultimo modelo y “sports betting”. Tambe bo por disfruta di un dushi bebida personalisa na Ventura Bar cu ta localisa den e casino.

Tur esaki ta disponibel pabo na The Casino at St. Regis Aruba.

Pa mas informacion, bishita nos casino “VIP Desk” of yama nos na tel: 2812374

Nos ta wardabo!

CICLISTA BAO INFLUENCIA A DAL NA E RAND DI ACERA Y A DAL ABAO HAYA UN BOLOBONCHI



Diaranson anochi a drenta informe di cu tin un homber benta riba caminda y no sa si ta auto a dal e, mesora a dirigi tanto polis como ambulans na e sitio.

Na yegada di e patruya y e ambulans a bin compronde cu e tabata coriendo bicicleta pero como e tabata poco bebi ela bay dal na e rand di acera y a dal abao. Personanan cu a wak e mesora a bay pa yud’e pero a nota cu e tabata inconciente y pesey a yama pa ambulans.

E paramediconan di ambulans a yud’e y a atende na e sitio mes.



MINISTER DOWERS NA EVELYN: “LAGA SA CUANTO FAMIA DI BO A NOMBRA DEN RAAD Y SI E TA CONTA COMO REGLA DI BON GOBERNACION



Minister di Husticia mr. drs. Arthur Dowers a tuma nota di declaracion haci recientemente door di ex-prome minister Wever Croes, caminda el a indica di bay demanda y tene Minister Dowers personalmente responsabel, relaciona cu suma, debe y/of pago di compania di utilidad.

Cu asombro Minister Dowers a constata e disparate aki y na mes momento recorda e ex-prome minister cu mescos e ta kere di bay tene hende responsabel, na e momento aki tin hende cu ta bay tene e responsabel. Ta su persona ta tras di tur locual a tuma laga.

Un ex-prome minister cu, na prome laga a nombra henter su famia y partijraad di MEP den e organisacionnan gubernamental aki, haciendo cambio den statuut y practicamente podera y haci nan mes doño di compania. Tin cu keda ripiti pa pueblo compronde.

Parlamento di Aruba a nombra un gobierno, y como tal mester por tin e autoridad di por maneha na drechi, conhuntamente cu compania di utilidad di e pais / di pueblo.

“Mi ta reta Evelyn Wever-Croes pa e publica e reglanan di Bon Gobernacion / Good Corporate Governance y cual el a tene su mes na dje”, ta palabra di Minister di Husticia Arthur Dowers.

Minister Dowers ta reta Evelyn mustre na unda den e regla ta stipula cu por nombra henter su famia y amigonan den un raad. Tambe si por indica na unda den e regla ta poni cu por tin nombracion di su swa, su primo, su actoprime y tur cu ta riba lista di MEP.

Tambe Minister Dowers ta pidi pa indica den regla di Good Corporate Governance unda ta menciona cu e famia den raad, ta sinta den reunion y haci negoshi personal y purba gana placa riba lomba di e compania. Ta situacionnan cu a tuma laga durante su gobernacion.

Un miembro di hunta di comisario sinta eynan sin cu por bisa nan nada, sin cu por comproba si nan ta produci si of no den nan

funcion. Ademas di esey na momento cu gobierno cambia, enbes di tene honor na nan mes, kier cobra sumanan cuantioso, casi shen mil florin.

Esakinan ta regla di Good Corporate Governance cu Evelyn a traha y cu Minister Arthur Dowers ta apela na su persona pa e publica nan, pa asina por bay den un debate habri cu n’e relaciona cu e materia en cuestion.

Esun cu ta biba den cashi glas no mester tira piedra. Analisa bon ken tur ta den raad, kico nan a yega di haci. No ta di awe a drenta politica y ta masha hopi cos e ta na altura di dje. “Si kier tene na nivel halto of kier baha na nivel di caya, djis laga sa, pasobra no ta di awe mi ta”, Minister Dowers a bisa.

Durante dianan di calor

TA IMPORTANTE PA TUMA MEDIDANAN DI PRECAUCION

21.05.2023: Durante e ultimo dianan nos por a tuma nota di un calor extenso, temperatura hopi halto y un solo fuerte. Durante e dianan cu ta sigui comunidad por bay sigui experiencia esaki cu por ta peligroso pa nos salud. Pa combati e fenomeno di naturalesa aki no ta posibel, pero si nos por tuma accion pa proteha nos mes y otronan y tambe preveni consecucionan pa motibo di e calor extenso.

e calor aki. Ta hopi importante pa vigilanan constantemente y refresca nan curpa pa wanta e temperatura abou y hidrata nan cu suficiente likido pa evita un posibel heatstroke, cu ta un

condicion hopi delicado caminda cu e curpa ta stop di soda. E temperatura di curpa ta sigui subi mas cu 40° grado Celsius y ta perhudica e centro di control cu ta regula e temperatura corporal den nos cerebro.

Sintomanan di un heatstroke ta:

- Temperatura corporal halto den corto tempo
- Cara y cuero cora y seco
- No ta soda mas
- Curazon ta bati dura
- Dolor di cabez
- Mente ta bira confuso y por cay flow

- Por cuminsa saca of haña diaree

Kico pa haci den caso di un Heatstroke ?

- Busca asistencia medico mesora yama 911
- Tene e persona trankil y den fresco
- Los e pañanan na su curpa.
- Fria e curpa cu un serbete/paña muha (cu awa friu of di cranchi)
- Por pone ijs of icepack bou di brasa, na nek, lomba, riba stoma y/of memey di e pianan.
- Si persona ta consciente lag’a bebe awa no mucho friu.

PROME MINISTER MIKE EMAN A LOGRA ACUERDO PA POR TRASPASA CASNAN DI FCCA

Den cuadra di un reunion importante yama pa Prome Minister mr. Mike Eman, hunto cu Minister di Infraestructura drs. Rene Herdé y e instancia relevante manera DLV, DIP y FCCA, a trata e situacion cu ya algun tempo ta afecta hopi famianan na Aruba: e falta di traspaso legal di casnan di FCCA pa nan legitimo doñonan.

Durante bishitanan den diferente barrio, hopi habitante a expresa nan preocupacion directamente na Prome Minister Eman tocante

un situacion cu nan ta considera inhusto. Ta trata di 99 famia cu a paga completo pa nan cas via huurkoop, pero nunca a ricibi e akta notarial cu ta duna nan derecho legal como propietario.

Na momento di haci e ultimo pago di nan huurkoop, hopi ta esnan cu a keda sorprendi cu tabatin otro obstaculonan administrativo y tecnico cu tabata impedi e traspaso final. Un di e obstaculonan principal ta cu algun di e terenonan riba cual e casnan ta construi, no



tin marcacion oficial pa determina e area exacto di cada tereno.

Pa e retonan aki, Gabinete AVP-Futuro a pone prioridad riba busca

solucionnan structural, pa yega na un registracion y traspaso legal, y asina duna seguridad y paz mental na e famianan afecta. Durante e reunion, a logra un acuerdo firme


cu e stakeholders presente, cu pa fin di 2025, tur e 99 casnan lo keda marca formalmente y traspasa na nan respectivo doño.

HOBEN A “PASSOUT” BANDA DI E BUSHALTE DILANTI BARCELO NA PALM BEACH




Diahuebs madrug a drenta informe di cu un mucha homber a “passout”, mesora a dirigi tanto polis como ambulans pa e sitio.

Na yegada di e patruya a bin compronde cu aki ta trata di un hoben di apenas 18 aña cu un rato prome tabata bon bon y diripiente a sak den otro. Lo por ta posibel di lo a



tuma alcohol y/of droga. Na yegada di e ambulans nan a atende y a transporte pa hospital.

ATROBE CAMBIAMENTO DI "LANE" TA CAUSA ACCIDENTE NA ROTONDE BANDA DI GUARDIAN GROUP



Diaranson atardi a drenta informe di un accidente na e rotonde banda di Guardian Group, mesora a dirigi un patruya na e sitio. Na yegada di e patruya a b i n a bay cambia di "lane" robes pa bay banda drechi y a bay dal riba e Kia Rio. Afortunadamente ningun hende a resulta herida.

BOMBERONAN A SALI BAY WASHINGTON PA HOLOR DI GAS!



Diaranson merdia a drenta informe di un holor fuerte di gas na Washington, mesora a dirigi un unidad di bombero despues di a core rond den vecindario no a bin encontra cu nada pero na un cas si por a mira 2 cilinder di gas buta pafo pero ya no tabata tin lekmento mas.

Cacho riba caya a morde un peaton di edad y ambulans mester a bay atende!



Diaranson atardi a drenta informe di cu un cacho a morde un peaton di edad y esaki mester atencion medico na Reaumurstraat, mesora a dirigi un ambulans na e sitio. Na

yegada di e ambulans a compronde cu e cacho no a morde e persona di edad eyan pero si den e vecindario y ademas di e mordi a lag"e den un susto increible.

CHAUFFEUR DI UN TOYOTA VITZ A BAHAMINDA NA MAN DRECHI DAL PALO DI LUS



Diahuebs madruga a drenta informe di un accidente cu hende herida na Tanki Flip, mesora a dirigi tanto polis como ambulans na e sitio. Na yegada di e patruya a

bin compronde cu aki ta trata di un accidente unda un chauffeur di un Toyota Vitz a baha caminda na man drechi y a bay dal riba un palo di lus. Debi na e impacto fuerte e

palo di lus a scheur y e chauffeur a dal su cabes na e windshield. Na yegada di e ambulans nan a atende e chauffeur na e sitio mes.



MINISTER GERLIEN CROES TA RECONOCE E LOGRONAN INTERNACIONAL DI NOS AMAZONAS, ARUBA TA ORGUYOSO!

Oranjestad, 31 di juli 2025 – Minister di Deporte, mr. Gerlien Croes, a yama un caluroso bonbini y a expresa su gran felicitacion na Amazona Carolina de Cuba, cu a representa Aruba dignamente na Santo Domingo y a logra conkista Medaya di Oro den competencia internacional di cabay. Minister Gerlien Croes ta tuma e oportunidad pa tambe felicita amazona Sarah Toet, Lea Vink y Genesis Pietersz pa nan participacion impresionante y logronan na un competencia similar na Colombia, caminda Sarah y Lea a ocupa e tercer luga y Genesis e cuarto luga den nan categoria. Aruba ta sumamente orguyoso di e esfuerso, disciplina y prestacion cu cada un di e atletanan aki



a demostra durante nan participacion den exterior. Nan representacion digno ta refleha e potencial grandi cu Aruba tin den deporte y ta un inspiracion pa nos hoben y comunidad deportivo. Minister Gerlien Croes a reafirma su apoyo

continuo na deporte y a compromete pa sigui crea mas oportunidad pa nos deportistanan bria tanto local y internacional. Pabien Carolina, Sarah, Lea, Genesis y tur e atletanan cu ta pone Aruba riba mapa cu orguyo y pasion!

Clasificados

SOLODIPUEBLO@GMAIL.COM
CEL. 585 9500

Formacion Sindical importante pa futuro di sindicato. 250731

Pa un sindicato sobreviví y keda alcaso cu e lucha di trahadornan e mester keda mantene un formacion continuo, pa semper tin e generacion ni relevo presente pa tuma over, ora ta necesario. Formacion mester duna contenido na locual ta sosodiendo na nos pais y tambe kico ta pasa cu e trahadornan na nivel internacional. Formacion di lidernan no ta un proceso facil, ni barata, pero e sindicato mester cumpli cu ne. E ta costa e sindicato placa si e sindicato kier hacie bon y segura su futuro. Un sindicato cu un liderasgo correcto ta traha cu un plan con ta gasta e placa di contribucion tur aña. Un presupuesto anual, den cual ta definí e entradanan y e gastonan cu e sindicato tin. Den e gastonan no por lubida e formacion sindical. Na inicio di añanan 90, di siglo pasa, despues cu a pone orden den finansas di SEPPA, dirigientenan di SEPPA, bao liderasgo di Gregorio Wolff, a dicidi cu 30% di tur entrada di presupuesto di SEPPA ta bay na formacion sindical.

Formacion sindical den SEPPA den pasado tabata fuertísimo. E delegadonan di SEPPA di como 25 pa 35 aña pasa por corda, e hopi dlanan di estudio cu nos tabatin tur aña, unda expertonan Arubiano y tambe di afor tabata duna lectura na delegadonan y miembronan di directiva di SEPPA, tambe na otro lidernan sindical di Aruba, den e añanan 90 di siglo pasa. Gobierno tin un ley special pa duna dlanan liber na lidernan y delegadonan sindical y nos tabata haci bon uzo di e ley aki. Gobierno tambe tin bentaha ora lidernan y delegadonan sindical ta bon forma. SEPPA tabatin acuerdo cu institutonan di formacion renombra na Caracas, Venezuela. Cu ILA, Instituto Laboral Andino, tambe cu Friedrich-Ebert-Stiftung o The Friedrich Ebert Foundation. Tur dos centronan di formacion renombra cu hopi bon Formadornan. Hasta SEPPA por

a tene dos seminario tur dos di un siman na Caracas, cu bastante lidernan y delegadonan di SEPPA. Un bon formacion di e delegadonan tabata e motibo cu SEPPA tabata hopi militante e periodo ey. Semper ora lidernan di SEPPA haci un yamada pa accion, e delegadonan di SEPPA tabata presente y percura pa SEPPA ta fuerte para ariba caya pa respalda e exigencianan di nan sindicato SEPPA. Na Aruba tambe nos a organisa seminarionan Internacional cu formadornan di otro paisnan Latino-America y di Hulanda.

Manera splica e formacion mester pone den practica, cu SEPPA semper tin su lidernan prepara, tambe tin e generacion di relevo di lidernan/dirigientenan prepara pa tuma over e liderasgo den SEPPA. E lider Maximo di SEPPA no por keda mas cu 12 aña den funcion. Wolff a baha como lider maximo despues di 12 aña, esaki segun e palabracionnan.

Awe Formacion sindical den SEPPA, por bisa ta nihil o minimal. No por!!

E diferencia cu awe den SEPPA, ta manera nochi y dia, nos no ta tende, ni lesa cu tabatin encuentronan di formacion. Awe nos ta wak cu e lider maximo di SEPPA tin 25 aña den funcion, unda si nos tuma na consideracion su maneho cu erronan grandi manera:

Keda sin tene eleccion; no ta duna informacion; no ta duna formacion correcto manera e mester ta; no tin directiva pa haci e controlnan; no tin control ariba e gastamento di placa; no tin ningun sorto di plan y hopi mas asunto pa menciona.

Tur ta erronan grandísimo y no digno pa un sindicato serio manera SEPPA.

E falta di un plan di formacion pa hopi, e ta parti di un plan macabro, un plan cu tin e meta eytras pa deliberadamente no duna formacion pa no crea lidernan nobo, esta e generacion di relevo. Lew-lew e lider cu tin

25 aña na mando, ta gaña muri, esta bisando cu e no kier keda mas. Su circulo ront di dje ta bin yore y bise cu e mes mester keda. Pakico, pasobra e no a percura pa un bon plan di formacion y consecuentemente crea e generacion di relevo. Porta e lider maximo kier keda 10 aña mas, total 35 aña. Porta 20 aña mas te ora e hubila cu su 80 aña. Pa un lider keda 25 aña den e mesun funcion no ta bon pa SEPPA, cual ta nifica 13 aña stanca o tranca. Pa e persona tambe, e no ta dinamico mas, e no ta prepara su mes mas, su conocimiento tambe ta tranca, e ta papiando sin fin, pero sin bisa mucho cos, esta loke nos ta yama na papiamento, e ta Tèlèlè. E organisacion ta bay di malo pa pio.

Aparentemente SEPPA no tin e lidernan forma y prepara pa lucha.

SEPPA ta un sindicato unico na Aruba cu un infraestructura tremendo, un sede sindical cu un sala di congreso pa 75 te 100 persona, un cooperativa pa su miembronan por spar y presta placa, pero SEPPA ta cayendo hopi ultimo tempo, bo no ta lesa o tende cu SEPPA tin un plan kico nan ta bay haci. No tin programa na radio manera antes, ni na Television.

Bo no ta tende nada di indexering, esta ahusta salarionan na subimento di costo di bida, e accion number UN di un sindicato cu ta lucha. Antes den e añanan 90 di siglo pasa, ta nos di SEPPA ta manda proposicion cu cifranan na Gobierno. Aña pasa, nos a ricibi informacion cu ta gobierno a yama sindicatonan den sector publico pa papia ariba indexering, no ta sindicato a exige negociacion. Ta Gobierno a ofrece un pakete.

Tin otro asuntonan cu ta pega ya pa mas di 20 pa 25 aña, manera e seguro medico adicional, AZV+ cu trahadornan y Pensioenadonan di Sector Publico tin y pa cual nos ta pagando un prima extra pa un pakete extra pa areglonan cualnan

no ta den e pakete general di AZV, manera bril, diferente tratamento na e dentista y otronan. Tur ta igual ainda manera 20 pa 25 aña pasa. SEPPA a keda inactivo, lidernan no sa kico ta negocia.

Asina tin hopi asuntonan mas cu mester di wordo renegocia cu Gobierno.

Tur e asuntonan aki cu SEPPA no ta duna atencion ta pa motibo di un fayó grandi den formacion den SEPPA. Nos no tin lidernan forma y prepara pa lucha.

Auque cu Sra Brito tin 25 aña como lider maximo di SEPPA, parce e a perde e meta pakico e ta lider sindical y pa kico e mester lucha. Den bon papiamento nan ta bisa. E Secretario General a perde e strea di nort. Esaki ta causando un desaster den SEPPA.

Final

Nos ta spera cu miembronan di SEPPA ta bira conciente di e situacion.

SEPPA ta un sindicato cu un tremendo infrastuctura y un historia di lucha, no solamente ariba caya cu welganan y batayanan cu nos a hiba, pero tambe ora di negociacion, semper nos tabata para fuerte cu nos posicionnan husto pa e miembronan di SEPPA y pa otro trahadornan. E situacion actual den SEPPA no por persisti, mester di cambio. Tur miembro conciente cu kier pa SEPPA bay dilanti mester lucha pa un cambio. Hopi ya a declara cu nan ta dispuesto pa lucha pa e cambio pa mihor, pa cambia e situacion actual den SEPPA, pa hala un banda, un lider cu ya tin 25 como lider maximo cu no ta forma, ni prepara.

Hopi ta cu C.R.D.S, e Comision pa Restaura Democracia den SEPPA. Ban trece formacion bek den SEPPA, pa den forma correcto y democratico crea dirigientenan nobo, e generacion di relevo pa tuma over nos sindicato.

Gregorio Wolf Michiel G.
Croes 31 juli 2025



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - July 31, 2025

 Sorteo # 8609 0368 7076 6744  FP  Sorteo # 7653 2394  FP  Sorteo # 2358 1317  Sorteo # 6412 3485 Virgo  Sorteo # 1342 357  FP	 Sorteo # 2614 0x Jackpot 0x Match 4+ 0x Match 4 112x Afl. 12.00 14-15-16-17-35 Joker 19 Letter G Proximo Jackpot 320.000,-	 Sorteo # 6902 0x Jackpot 0x Match 4 129x Afl. 8.00 12-15-18-19-22 Proximo Jackpot 64.000,-	 Sorteo # 0x Jackpot 0x match 4 0x Afl. 500.00 0x Afl. 50.00 0x Afl. 15.00 Mega Ball Proximo Jackpot 310.000,-	 Sorteo # 0x Jackpot 0x match 4 0x Afl. 500.00 0x Afl. 50.00 0x Afl. 15.00 Mega Ball Proximo Jackpot Afl. 460.000,-	 Sorteo # Sorteo # 217 201218 
---	---	--	---	--	--



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - July 31, 2025

 Sorteo # 4697 2611 0294 5948  FP  Sorteo # 4697 7639  FP  Sorteo # 2753 7589  Sorteo # 4697 1479 Piscis  Sorteo # 1571 171  X2	 Sorteo # 0x Jackpot 0x Match 4+ 0x Match 4 0x Afl. 12.00 Joker Letter Proximo Jackpot 320.000,-	 Sorteo # 0x Jackpot 0x Match 4 0x Afl. 8.00 Proximo Jackpot 64.000,-	 Sorteo # 0x Jackpot 0x match 4 0x Afl. 500.00 0x Afl. 50.00 0x Afl. 15.00 Mega Ball Proximo Jackpot 310.000,-	 Sorteo # 0x Jackpot 0x match 4 0x Afl. 500.00 0x Afl. 50.00 0x Afl. 15.00 Mega Ball Proximo Jackpot Afl. 460.000,-	 Sorteo # Sorteo # 
--	--	--	--	---	--

SUDOKU

	7		6					
	9		5		3		1	7
				1				
	8						4	3
		2				6		
4	5						7	
				3				
7	4		2		5		6	
					4		2	

	3	8	5	7			9	
	6			1		5		7
	1		3		9		8	
6	9	3		4		7		
2		4			5		6	1
				8			4	9
8			4			9		
3					8	6	7	
5	7		1					4

			8		1			
						4	3	
5								
				7		8		
						1		
	2			3				
6							7	5
			3	4				
			2			6		




¡Encuentra nombres de plantas medicinales y alimentos culturalmente significativos que tenemos en la región!

F	E	S	T	A	F	I	A	T	E	Y	Q	X	V	I	Q	U	O	K	B
M	R	U	D	A	R	H	I	E	R	B	A	B	U	E	N	A	U	G	W
P	M	S	P	V	K	Z	M	T	R	R	C	O	V	O	S	Y	R	O	J
O	R	E	G	A	N	O	O	N	G	Q	H	J	L	K	M	E	R	R	H
O	S	L	N	U	B	G	A	O	M	L	B	L	H	G	P	G	A	D	D
D	A	Z	A	C	A	T	E	L	I	M	O	N	W	N	M	P	Y	O	V
W	U	N	Y	A	R	W	U	S	T	P	B	T	I	S	K	K	F	L	N
E	C	T	O	R	O	N	J	I	L	M	O	R	A	D	O	I	I	O	L
H	O	J	P	W	Z	E	G	E	H	X	Z	A	R	P	E	E	I	B	O
I	M	U	I	C	L	E	D	U	F	H	H	U	S	Q	G	X	U	O	U
E	L	F	E	V	D	A	G	D	M	A	N	Z	A	N	I	L	L	A	H
R	K	O	G	P	B	B	D	Q	T	N	N	J	E	Q	U	G	Z	T	N
B	O	J	U	R	A	E	X	N	O	E	C	I	P	B	K	T	L	A	P
A	P	V	E	G	O	R	A	T	C	I	T	S	A	N	V	I	S	V	W
A	B	I	A	H	F	S	N	A	K	M	G	D	Z	N	O	S	Q	R	I
M	H	A	P	D	A	A	M	I	B	J	W	Q	O	E	I	G	O	M	W
A	X	E	X	J	G	F	M	V	C	O	U	D	T	L	I	A	M	U	R
R	B	E	O	I	J	W	P	K	Q	A	F	H	E	X	A	Q	Q	U	B
G	I	H	G	V	B	X	P	P	P	I	Q	M	U	E	E	D	G	W	Y
A	F	K	I	H	I	E	R	B	A	D	E	L	G	O	L	P	E	A	D



HIERBA DEL POLLO
HOJA SANTA
TORONJIL MORADO
ARNICA
EPAZOTE
ZACATE LIMON



ESTAFIATE
HIERBA DEL GOLPE
GIGANTON
MUICLE
HIERBA AMARGA
MELISSA



MANZANILLA
OREGANO
HIERBABUENA
SAUCO
GORDOLOBO
RUDA



Dieet sin awa? Algo e ora no ta bon

Un nutricionista Italiano a studia pa dies aña e efectonan di su consumo. Nicola Sorrentino, reconocido nutricionista Italiano y profesor di Higiena Nutricional na e Universidad di Pavia, a skirbi un buki di recomendacionnan alimenticio titula "E dieet di awa." E academico, medico di varios famoso di farandula Italiano, a studia pa dies aña e efectonan di bebe awa.

Segun un publicacion di e corant Spaño ABC, e recetario aki ta inclui "un dieet depurativo y energetico" cu ta elimina e alimentonan vet, hasa y bebidanan alcoholico y priorisa e bebida, fruta y berdura. Awa "ta e secreto di tur cos," el a informa aABC. Esaki t algun di e consehonan di e dieet:

Bebe awa ta yudabo perde peso

Ta recomenda pa bebe ocho pa dies glas di awa pa dia a lo largo di henter e hornada, semper prome cu come. Apesr cu e "efecto adelgasante" di awa no ta compara cu haci ehercicio of cuminsa cu un regimen, e ta un contribuyente importante. Sorrentino a afirma cu bebe awa ta permiti "acelera e efectonan di un dieet hipocalorico," adelgasando mas rapido y kitando e sensacion di hamber.

Sacia e hamber

E alimento mas "diet" cu ta existi ta awa. E no tin caloria, e ta colabora den elimina toxina pasobra e ta colabora cu drenahe. Y riba dje, tambe e ta sacia hamber. Segun Sorrentino, tuma dos glas di awa prome cu desayuno, almuerzo y cena, ta posibilidad cu e cuminda "ta yenabo mas." Awa cu gas, ta potencia e



sensacion.

Aumento di metabolismo

Segun Sorrentino, a keda demostra cu bebiendo dos glas di awa (mey liter) pa dia, riba temperatura ambiente, lo aumenta un 30% di e tasa metabolico. Den palabranan simpel, e ta aumenta 30% e velocidad pa kima caloria. ABC ta comenta cu "den tur estudio," awa ingeri cu un stoma bashi tabta tin un efecto di "breve duracion" riba metabolismo (mey of un ora). Pa e motibo ey, Sorrentino ta recomenda bebe awa den diferente momento di dia. Un ehempel por ta mey liter cuater biaha pa dia, cu ta multiplica pa cuater e perdida di caloria.


Apesar di e bondadnan di awa, e nutricionista ta alerta cu bebe un cantidad excesivo di awa, por tin "efectonan no desea", principalmente pa esnan cu tin problemanan di curason of renal.

Alimento y cuidado

Sorrentino ta recomenda no bebe demasiado koffie, thee, ni bebidanan cu un contenido halto di cafeina. Di otro banda, plantea pa limita e consumo di biña na un glas pa dia y ta sugeri pa no bebe bebidanan alcoholico pa su efectonan negativo pa e tripanan. Tambe e ta recomienda come cuater cuminda pa dia y elimina "progresivamente e cantidad di sucu.

"Dios ta amor... y amor ta Dios,
maske mi no ta na e mundo aki, tur dia lo mi ta banda
di boso Curazon, mi por stens di loke Señor ta hasi"
Salmo 33

Cu dolor na nos curason, nos ta participa fayecimento
di nos ser stima:



Sr. Victor M. Giel

Mihor conoci como "Toy"

*14-05-1941 – 25-07-2025

Acto di entierro lo wordo anuncia despues

Gradicimento



Segunda Mathilda Laclé-Flanegin

Mihor conoci como Thilda, Oma of Omachi, Tanchi,
Tanti, Mama y Pepe

Nos kier gradici tur tur persona, tur famia, amigo y
conocinan cu a compana nos den e ultimo simannan
duro aki.

Danki na tur yamada, whatsapp y emails.

Danki pa tene nos den pensamiento y oracion.


Danki pa boso sosten, pa boso tempo y boso presencia
pa cana cu nos y cu nos mama pa su ultimo luga di
sosiego.

Sa cu boso tabata di gran consuelo pa nos y cu nos ta
aprecia esaki di henter nos curason.

FORTALEZA PA FAMIA

Scirbi pa Pastor Marcel Balootje.

ANTES HENDE NO TABATA KERE, AWOR NOS TUR TA MIRA



Locual a pasa na Rusia por pasa na tur parti di mundu, pasobra e palabra di Dios no ta conta pa un parti di mundo so, tampoco pa cierto pais , pero e ta conta pa henter mundo, locual ta para scirbi den Mateo capitulo 24 y 25:1-13 y 25: 32-46.

Pero tambe laga nos tene na cuenta Mateo 13:24-30 y Mateo 13:24-43. Y den testament bieu, tur e profetanan cu a scirbi locual awor aki ta tumando lugar y lo bay tuma lugar pasobra e binida di nos Senyor Hesus Cristo ta serca.

E cos nan aki no ta pa spanta hende, pero ta pa confirma un biaha mas manera ta para scirbi den Lucas 21:31-36 bisando: Di berdad, di berdad Mi ta bisa boso, e generacion aki lo no pasa prome cu tur cos tuma lugar, Cielo y tera lo pasa, ma Mi palabranan lo no pasa.

Tene cuidao pa boso curason, no ta carga pa causa di paranda, y buracheria, y e preocupacion di bida, y e dia ey no bini diripiente riba boso manera un trampa. Pasobra e lo bini riba tur esnan cu ta biba riba

superficie di henter mundo. Ma sea alerta, tur ora bay, haciendo oracion pa boso por tin forsa pa scapa di tur e cosnan aki, cu ta bay tuma lugar y para dilanti di e Yiu di hende.

Awor nos tur ta mira con buracheria, paranda, inmoralidad, preocupacionnan di bida, materialismo a aumenta, hende a perde respet pa Dios, pa nan mes y pa bida di nan prohimo.

Locual Pablo a scirbi den 2 Timoteo 3:1-5 , awor nos ta mire ta cumpli completamente, sin kita, sin



pone manera hende grandi ta bisa, unda cu nos bira. nos ta mira con maldad ta crece y hende ta sostene maldad, y ora maldad wordo reprende hende ta rabia.

Wak con hende ta pensa awendia, por ehempel nan auto por drecha, nan cas por drecha, pero ora yega na e matrimonio esey si nan no ta kere cu e por drecha, y nan ta haci tur locual ta posibel pa divorcia, pa sigi venga otro, mientras cu yuinan ta keda traumatiza.

Hende ta haci tur cos pa troce e palabra di Dios, y haci manera ta un cos di broma cune, ora nan por bay contra Dios su palabra y su principianan, practica di maldad y inmoralidad a bira un show, algo di celebra, laga nos mira solamente con uso di droga a bira algo publico den nos comunidad, sin ningun clase di respet, ni pa hende grandi , ni pa mucha.

Y hasta ta pone hende pensa cu tin cierto barrio y cierto

skina , cu autoridad a lubida, of nan no kier bay , pasobra ta un berguensa enorme locual ta sosode ey banda.

Nos tur ta mira cu locual e palabra di Dios ta bisa den Romanonan 1:18-32 ta cumpliendo y ningun lo tin excuus. Solamente Dios lo tin misericordia.

Pero no lubida e plan di salvacion bunita cu Dios a ofrece na henter mundo bisando:

Pasobra Dios a stima e mundo asina tanto cu E a duna su Yiu unigenito, pa ken cu kere den dj'E no bay perdi, ma tin bida eterna. Dios no a manda e Yiu pa condena e mundo, ma pa mundo wordo salba door di dj'E.

Awendia tin comercio di religion, pero Salvacion ta bini unicamente di Cristo Hesus, Cristo Hesus ta e caminda, e berdad y e bida, ni un hende no por yega serca e Tata si no ta pa medio di e Yiu.

Oracion di dia

Un feliz dia yena di hopi fe y speransa den nos bon Dios

"...sino conta e generacion venidero: esta gloria di Señor, su poder, ye cosnan milagroso c'El a haci." (Salmo 78, 4bc) E Evangelio di awe ta cuadra, manera semper, tempo cu ami tabatamucha. Mi mayornan semper tabata educa mi tocante di Dios, Cristo Hesus y Spirito Santo. Y un Bijbel no tabata haci falta. Haci oracionta cos di tur dia. Y sin falta bishita e cas di Dios.

Awendia nos ta ripara e generacion di awo, no tin mucho balor pa cu Dios. Pero anos a sigui conta nos yiunan tocante di Dios manera nos grandinan a haci? Anos a siña e hubentud tocante e milagronan y sacrificio cu Cristo Hesus a haci? Of di e donnan cu Spirito Santo tinpa nos? Y anos a tene man di nos yiunan, hibando nan, tur siman, pacas di Dios pa scucha su Palabra? Ban sigui cu e bunita custumber cunos grandinan a haci. Ban sigui hiba e futuro generacion ariba e caminda cu Cristo Hesus a traha pa nos. "...pa nan tambe confia den SEÑOR, no lubida Dios su obranan grandi..." (Sal 78, 7) Oracion: Señor mi Dios motiva mi y guia mi, cu yudansa di Spirito Santo, ariba mi responsabilidad pa conta y educa e generacion nobo di

Bo Maraviya.

Y inspira nan pa nan sigui conta na e siguiente generacion.

Amen.

